



اصالة في قلبين

توفيق الحكيم

رصاصة في قلبين

تأليف
توفيق الحكيم



رصاصة في قلبين

توفيق الحكيم

الناشر مؤسسة هنداوي

المشهرة برقم ١٠٥٨٥٩٧٠ بتاريخ ٢٦/١/٢٠١٧

يورك هاوس، شبيث ستريت، وندسور، SL4 1DD، المملكة المتحدة

تليفون: ٨٣٢٥٢٢ ١٧٥٣ (٠) ٤٤ +

البريد الإلكتروني: hindawi@hindawi.org

الموقع الإلكتروني: https://www.hindawi.org

إن مؤسسة هنداوي غير مسؤولة عن آراء المؤلف وأفكاره، وإنما يعبر الكتاب عن آراء مؤلفه.

تصميم الغلاف: ولاء الشاهد

الترقيم الدولي: ٩٧٨ ١ ٥٢٧٣ ٣٨٩٨ ٢

صدر هذا الكتاب عام ٢٠٠٥.

صدرت هذه النسخة عن مؤسسة هنداوي عام ٢٠٢٦.

جميع حقوق النشر الخاصة بتصميم هذا الكتاب وتصميم الغلاف محفوظة لمؤسسة هنداوي.

جميع حقوق النشر الخاصة بنص العمل الأصلي محفوظة لأسرة السيد الأستاذ توفيق

الحكيم.

رصاصة في قلبين

(صالون نسائي في قصر سيدة شرقية، تجتمع فيه نخبة من سيداتٍ يُمتلنّ مختلف الجنسيات العربية، فيهنّ السعودية، والسودانية، والأردنية، والليبية، واليمنية، والقطرية ... إلخ، إلخ.)

(تقول لهنّ صاحبة القصر: اسمعوا يا ستات ... إحنا اجتمعنا هنا الليلة علشان نفكّر في مشروع مهم جدًّا وخطير جدًّا ... الموضوع مؤامرة.)

جميع الستات (في صياح): مؤامرة؟ يا ساتر!

صاحبة القصر: ما تخافوش، دي مؤامرة جميلة ومفيدة ... والهدف منها المحبة وجمع الشمل ... إنتم طبعا شفتم فيلم «رصاصة في القلب».

الجميع: طبعا.

صاحبة القصر: اللي مثله ولحنه الموسيقار عبد الوهاب وألف قصته توفيق الحكيم ... وشافوه في أول عرض جدّا وأمّهاتنا ... من أربعين سنة!

الجميع: طبعا طبعا ... مش احنا.

صاحبة القصر: إيه رأيكم بقى ناخذ الليلة قرار بأن الاتنين — الموسيقار والكاتب

— يعملوا النهارده فيلم بعنوان «رصاصة» ...؟

— في القلب؟

* لأ ... المرة دي رصاصة في قلبين.

— قلب مين وقلب مين؟

* قلب عبد الوهاب وقلب الحكيم.

- بس دول دلوقتِ عَجَزوا.

* دي مسألة نشوف لها حل.

المهم الموضوع ... والموضوع ده بعد موافقتكم جميعاً يتلخّص في إن بنت جميلة تطلق من عينيها الحلوّة رصاصة تدخل قلب الاتنين في وقت واحد ... ونشترط عليهم إنهم ينتجوا عمل فني، المؤلف يؤلّفه، والموسيقار يلحنه، ويتنافسوا في الإبداع؛ كل واحد في اختصاصه ... واللي يفوز منهم في إبداعه يفوز بقلب الجميلة ... وبالطريقة دي نكون أدينا للفن والأدب أكبر خدمة ... إيه رأيكم؟

الجميع: فكرة جميلة ومفيدة.

صاحبة القصر: الأجل من كده إن الفكرة خارجة من اجتماعنا هنا كلنا ... واحنا كلنا هنا نمثّل نساء العالم العربي بمختلف دُوله وشعوبه ... يعني كل العرب اتحدوا وتضامنوا في تحقيق الفكرة.

الجميع: شيء جميل فعلاً.

* ومفيد فعلاً ... علشان ثبت إن السياسة يمكن تفرّق، لكن الفن هو اللي يوحد ... لأنه خارج من القلب، وقلبنا واحد.

- صحيح ... وننفذ الفكرة دي ازاي؟

* قبل كل شيء، مين اللي عليها تطلق الرصاصة؟

- لازم نتفق فيما بيننا على اختيارها.

* مش قبل كده ناخد رأي المجني عليهم؟

- حد ياخد رأي واحد في رصاصة حاتنطلق عليه؟!

* فعلاً. المفروض إن الرصاصة تنطلق الأول.

- والمفروض كمان إن الرصاصة تصيب القلب.

صاحبة القصر: المسألة كده حاتطول ... من رأيي نبدأ حالاً.

الجميع: نبدأ حالاً.

صاحبة القصر: نبدأ أولاً بالاجتماع بالطرفين: الموسيقار والمؤلف، ونعرض عليهم

الفكرة لاجل كل واحد منهم بيتدي مجهّز نفسه ويستعد للعمل فوراً ... إيه رأيكم؟

الجميع: موافقين.

[وقد أعاد توفيق الحكيم كتابة الجزء الأخير من الحوار السابق بعد تغيير

طفيف؛ التماساً للجودة ودقّة العبارة؛ لكي تصل إلى مرماها من القارئ

أو المستمع أو المشاهد الذي يستهدفه، وقد جاءت الصياغة كالتالي بعد هذه العبارة]:

الجميع: شيء جميل فعلاً.

* علشان كده اجتمعنا من كل الدول العربية.

– أيوه ... علشان نثبت إن السياسة يمكن تفرّق، لكن الفن والأدب هو اللي يوحد؛ لأنه خارج من القلب ... وقلبنا واحد ... مش كده ولا إيه؟!!

– تمام.

– المهم التنفيذ ... ننفذ الفكرة دي ازاي؟

* قبل كل شيء، مين اللي عليها تطلق الرصاصة؟

– مسألة صعبة ... ولازم نتفق فيما بيننا على اختيارها.

* مش قبل كده ناخذ رأي المجني عليهم؛ قصدي الموسيقار والمؤلف؟

– كلام إيه ده؟! حد ياخذ رأي واحد في رصاصة حاتنطلق عليه؟!

* فعلاً ... المفروض إن الرصاصة تنطلق الأول.

– والمفروض كمان إن الرصاصة تصيب القلب.

صاحبة الصالون: لأ ... المسألة كده حاتطول لغاية ما نختار واحدة تطلق الرصاصة

... والرصاصة تصيب وتنفعل مفعولها تاخذ وقت طويل، واحنا عاوزين نبدأ من دلوقتٍ ...

الأحسن نجتمع كلنا الأول بالطرفين: الموسيقار والمؤلف، ونعرض عليهم الفكرة ... لاجل

كل واحد منهم يجهّز نفسه ويستعد للعمل فوراً ... إيه رأيكم؟

الجميع: موافقين.

(ويذهب الجميع إلى صالة اجتماع بعد دعوة المؤلف والموسيقار، ويعرضون

عليهما الموضوع باختصار ... وهو أن يُعيدا عهد «رصاصة في القلب» يوم كان

العرب كلهم متفقين ومجتمعين حول الفن والحب المُخيم على الجميع. ولإعادة

هذا الجو، يجب أن يعود نفس المؤلف والملحن للتعاون معاً في عرض سينمائي

يؤلّف المؤلف موضوعه، ويقوم الموسيقار بوضع ألحانه. ولكي يتم تنشيط الاثنین

وإثارة حماس كلّ منهما، نهضت كل نساء البلاد العربية، القائم بالنيابة عنهنّ

النساء المُجمّعات، وقرّرن ترشيح واحدة جميلة العينين لتكون الملهمة لهما، وفي

نفس الوقت القاضية والمحكمة التي تحكم في النهاية على عمل كلّ من الموسيقار

والمؤلف، ومن ترى أنه قد امتاز وتفوّق على زميله في الإبداع الفني فاز بقلبها.)

وهنا يقول الموسيقار: وما هو الشكل الفني لهذا العمل؟
أ يكون مثلاً كوميديا موسيقية ... يعني قصة تتخلَّلها ألحان زي «رصاصة في القلب»؟

(وتأخذ النساء المجتمعات في الجدل والمناقشة على الطريقة النسائية إلى أن تقاطعهنَّ صاحبة الصالون قائلَةً: إنها تُفضِّل أن يكون الشكل الفني له علاقة بالدول والشعوب التي تُمثِّلها النساء الحاضرات؛ فمثلاً يكون الشكل الفني منوعات شعرية مُصوَّرة سينمائيًا على نسق قصيدة «لستُ أدري» للشاعر اللبناني^١ في «رصاصة في القلب» ... فيكون لكل بلد عربي مقطوعة شعرية منسوبة إليه؛ فالشعر العراقي إلى جانب شعر سعودي، إلى جانب شعر تونسي وسوداني وسوري ... إلخ، إلخ، ويقوم الموسيقار عبد الوهاب بتلحينها وتصويرها سينمائيًا ... وكلُّ هذا بالطبع يجب أن يدخل في إطار شكل قصصي خفيف الروح يكتبه المؤلف ... وبذلك يتعاون الشعر العربي كلُّه، ودوَّله العربية كلُّها في عمل سينمائي واحد. أما القصة فستكون حول الرصاصة التي تُطلِّقها من عينِها الجميلة مُصوَّبَةً إلى قلبِي الموسيقار والمؤلف، ثم التنافس بين الاثنين على الفوز بقلب الملهممة بعد أن تنطق هي بالحكم.)

عبد الوهاب: وحكمها ده نهائي؟

الحكيم: يعني مفيش استئناف ولا طعن؟

الجميع: نهائي ... نهائي.

صاحبة الصالون: طبعا نهائي ... لا استئناف ولا طعن ... لأنها تُمثِّل إرادتنا جميعًا،

وحايزة على ثقتنا كلنا.

الحكيم: وحاتكون هي الملهممة لنا؟

الجميع: طبعا.

عبد الوهاب: لا بد بقى تقابلنا، وتكون على صلة بعملنا.

الجميع: طبعا.

الحكيم: وكل واحد منا تقابله على انفراد ... لأن طبيعة عمل كل واحد منا مختلفة

... والإلهام أيضًا يكون مختلف.

^١ المقصود: الشاعر إيليا أبو ماضي.

الجميع: طبعًا ... طبعًا.

عبد الوهاب: يعني كل ما أحتاج للإلهام تحضر لي المهمة؟

الجميع: طبعًا ... طبعًا.

الحكيم: بس على شرط؛ تكون مقابلة حضرة المهمة لكل واحد منا بالعدل والقسطاس.

الجميع: طبعًا طبعًا.

عبد الوهاب: اتفقنا ... مش كده برضه يا حضرة المؤلف؟

الحكيم: أيوه اتفقنا ... بس ... مش تعرّفونا بقى بحضرة المهمة ... قصدي حضرة المحكمة؟

الجميع: حايحصل.

(الموسيقار عبد الوهاب والمؤلف توفيق الحكيم بعصاه يمسيان على ضفاف النيل يتحاوران.)

عبد الوهاب: أمّا فكرة!

الحكيم: أنا مش مرتاح لمسألة الرصاصه دي.

عبد الوهاب: وحايجرى إيه يعني؟

الحكيم: افرض إن الرصاصه صابت؟

عبد الوهاب: ما تصيب يا أخي ... ولا يهّمك.

الحكيم: ولا يهّمني إزاي ... إنت ما عليش، ولا يهّمك انت ... لأن القلب عندك لما يفتح تخرج منه أجمل الألحان ... لكن أنا بالعكس.

عبد الوهاب: بالعكس ليه؟ ليه ما تقولش إن القلب عندك انت كمان إذا انفتح خرج منه كلام حلو؟!

الحكيم: اسمع ... إحنا نسينا شيء مهم هو مسألة السن. الجماعة الستات دول نسيوا إننا في سن الشيخوخة.

عبد الوهاب: هم ما نسيوش ... اللي يهّمهم منّا أعمالنا الفنية ... وخبرتتنا اللي اكتسبناها من السن.

الحكيم: أنا عندي فكرة ... الستات دول عايشين في جو الأربعينيات ... جو «رصاصه في القلب» ... لا بد نرجع لهم أنا واثت شباب في الأربعينيات.

عبد الوهاب: إزاي؟

الحكيم: نبتعت لهم عبد الوهاب والحكيم أيام الأربعينيات.
عبد الوهاب: مش فاهم.
الحكيم: دلوقتِ تفهم.

(في الصالون الأدبي وجميلات البلاد العربية مجتمعات حول غادة رائعة الجمال
... وصاحبة القصر تقول لها):

* عرفتِ بقى حاتعملي إيه؟
- واشمعنا أنا بقى الي حاقوم بالدور ده؟
الجميع: علشان كلنا اخترناكِ إنتِ بالإجماع.
- بس أنا مش حاقدر أقول لدول حاجة.
* مش حاتقولي حاجة ... عينيك الحلوين دول هم الي حايقولوا.
- بس دول عجايز قوي!
* وتبصِّي لهم ليه؟ ... إنتِ حاتسمعي ألحان عبد الوهاب الحلوة بودنك ... أمَّا توفيق
الحكيم ...

- يا ساتر!
* استحملي وصبري نفسك ... إنتِ حاتعملي عمل وطني كبير ... البلاد العربية كلها
حاتشكرك.
- كتب التاريخ كانت بتقول الكلام ده عن أسطورة رمي البنت الشابة للنيل
والتماسيح.

* اطمئني ... التماسيح دول ما لهمش اسنان.
الجميع (ينظرون في الساعة): هم تأخروا كده ليه؟
- أنا خايفة!
صاحبة الصالون: ما تخافيش ... هم مش حايكلموكي.
- أنا حاغمض عيني.
* لأ ... بالعكس ... إحنا قلنا إيه؟ إنتِ لازم تفتحي لهم عينك الحلوة دي كويس
قوي، وتبصِّي لكل واحد منهم النظرة الي توقّعه.
- ربنا يقدرني!

(جرس الباب.)

الجميع: جرس الباب ... أهم حضروا.

صاحبة القصر: استعدّي.

– مش قادرة أبص لهم.

* تشجّعي.

(يظهر من الباب محمود ياسين بطربوش، ونور الشريف بالعصا والبيريه ...
ويُفاجأ الجميع ... وتُحمِلُ السيدات، ويجمدُن بلا حركة ... ويتقدّم محمود
ياسين مُقدّمًا نفسه.)

محمود ياسين: أنا محمد عبد الوهاب.

نور الشريف: وأنا توفيق الحكيم.

صاحبة القصر: إيه ده؟

محمود ياسين: لا مؤاخذه ... قلنا نيجي في سنّنا اللي كُنّا فيه يوم ظهور «رصاصة

في القلب» ... مش كده أحسن؟

نور: اسمحوا بقى وقدموا لنا صاحبة المسدس.

صاحبة القصر: أقدم لكم الآنسة ... فيفي.

ياسين ونور: تشرفنا.

فيفي (تنحني لهما برأسها وقد احمرّ وجهها وانشرح صدرها): أنا اللي حصل لي

الشرف.

صاحبة القصر: إيه بقى رأيكم؟!

ياسين: عرفتم تختاروا.

نور: بس مكسوفة شوية.

صاحبة الصالون: أصلها اتفاجئت ... زيّنا كلنا ما اتفاجئنا.

فيفي: كنت فاكراكم أكبر من كده شوية.

ياسين: شوية؟ متشكرين!

فيفي: أصل الحقيقة صور الجرائد بتصوّرکم كبار في السن.

نور: ماكياج ... بيعملوا لنا ماكياج يكبرنا ... مسألة دعاية صحفية ... لكن الحقيقة

إننا زي ما انتِ شايقة دلوقت.

ياسين: إحنا دلوقتِ كده أحسن.

فيفي: أحسن قوي ... إخص عليهم ... ليه يخفوا شبابكم ده؟!

رصاصة في قلبين

ياسين: ما دُمنّا كده عاجبينك يبقى الحمد لله.
فيفي: أنا سعيدة الي شفتكم على حقيقتكم دي.
نور: إحنا كمان سَعدا بالحقيقة دي.

صاحبة الصالون: تحبُّوا تشربوا إيه؟ مش تعزمي عليهم يا فيفي؟
فيفي: أنا أعرف إنهم يحبُّوا ياكلوا جلاس.

ياسين: وإنت كمان يا آنسة فيفي تحبِّي تاكلي جلاس ... وسبق أول ما شفتك قلت لك: تاكلي جلاس وتدوِّبي في قلوب الناس.
نور: لأ من فضلك ... ده أنا اللي شفتها الأول وقلت لها كده ... مش فاكرة يا آنسة فيفي؟

فيفي: أيوه تمام.

ياسين: إزاي ده؟ ده أنا اللي شفتك الأول وانتِ قاعدة تاكلي الجلاس، وقلت لك بتاكي جلاس وتدوِّبي في قلوب الناس ... مش فاكرة؟

فيفي: أيوه تمام.

نور: إيه الكلام ده؟

صاحبة الصالون: لازم انتم الاتنين شفتوها في وقت واحد.

فيفي: أيوه تمام ... زي النهارده كده.

ياسين: أبداً أبداً ... أنا كنت لوحدي، وساعة المسدس ما انطلق ...
نور: انطلق في قلبي.

ياسين: لا يا سيدي ... في قلبي أنا.

نور: قلت لك قلبي أنا ... بلاش مقاوحة!

ياسين: قلبك فين؟

نور: هنا (يشير إلى الجهة اليمين).

ياسين: أولاً القلب مش في الجهة دي.

نور: أمال يبقى في أي جهة؟

ياسين: في الجهة الشمال يا حضرة.

نور: الشمال؟ ليه ... هو أنا أشول؟! ... أنا بسلم بإيدي اليمين، وأكل بإيدي اليمين ... لازم كمان قلبي يكون في اليمين ... مش معقول كده!

فيفي: ما تتخانقوش ... مش مهم الجهة ... المهم القلب.

ياسين: طبعًا المهم القلب ... والقلب ده كان قلبي أنا.
نور: لأ يا سيدي ... إنت طبيب عيون مش طبيب قلب. وغنوتك المشهورة فاكرينها
كلنا ... طبيب عيون أفهم في العين.
ياسين: على كل حال، بكرة يا فيفي ألحنّ لك أغاني كتير عن القلب ... واسمحي لي
بنمرة تليفونك علشان أتصل بك وأسمّعك أول غنوة.
فيفي: تليفوني!
صاحبة القصر: أيوه يا فيفي إنّي له تليفونك ... ده الأستاذ عبد الوهاب لازم يسمّعك
ألحانه الجديدة.

نور: وأنا رُحت فين؟ مفيش نمرة تليفون علشانى أنا كمان؟!
ياسين: ليه؟ ناوي تسمّعها إيه؟
نور: مش شغلك ... ده سر.
ياسين: اسمحوا لي أستاذن، عندي مواعيد ... وانتِ يا آنسة فيفي، أنا سعيد الي
شفتك ... وانتظري مني تليفون.
نور: وأنا كمان زيه ... وانتظري مني تليفون ... خدني معاك.
(يخرجان.)

(السيدات يضحكن كلهنّ.)
صاحبة الصالون: شاطرة يا فيفي ... الحمد لله ... المسألة يظهر حاتنفع.
فيفي: دلوقتِ حايقولوا عليّ عبيطة.
صاحبة الصالون: بالعكس ... إنتِ الي استعبطّتهم ... وعملتِ إنك صدّقتِ اللعبة
دي.

فيفي: والاتنين الكبار اتصرّفوا كده ليه؟
صاحبة الصالون: طبعًا سنهم ما يسمحش باللعب ده ... لكن المهم إنهم قبلوا
التحدي والمنافسة، والتحمس لفكرة العرض السينمائي وتلحين شعر البلاد العربية.
(عبد الوهاب والحكيم ينتظران عودة ياسين ونور ... وبمجرد حضورهما
يسألانها:)

عبد الوهاب: عملتم إيه؟

ياسين: كل حاجة تمام.

نور: حسب الخطة الموضوعة.

الحكيم: عظيم!

ياسين: وإيه المطلوب منا بعد كده؟

الحكيم: تتصلوا بالجماعة دول بالنيابة عنا ... وتكونوا إنتم حلقة الاتصال بيننا

وبينهم.

نور: والآنسة؟

عبد الوهاب: ما لها؟

ياسين: حاتكون علاقتنا بها إيه؟

عبد الوهاب: بعدين ... بعدين أقول لك. اتصل بي بالتليفون.

نور: وأنا؟

الحكيم: ابقى انت كمان اتصل بي بالتليفون.

(يخرجان.)

عبد الوهاب: ودلوقتِ ... إحنا حانعمل إيه؟

الحكيم: نمشي في المشروع.

عبد الوهاب: إزاي؟

الحكيم: أنا أختار لك الأشعار ... لكن يلزمننا مخرج ينظّم العرض.

عبد الوهاب: والآنسة؟

الحكيم: ما لها؟

عبد الوهاب: مش هي اللي حاتحكم بينا وقرارها نهائي؟!

الحكيم: أه صحيح.

عبد الوهاب: واللي يفوز ويكسب منّا ... حايفوز بقلبها.

الحكيم: والله أنا خايف من العيال دول.

عبد الوهاب: قصدك الحكيم المزيّف وعبد الوهاب المزيّف؟

الحكيم: تحب واحد فيهم واحنا الأصليين نروح بلاش.

عبد الوهاب: لأ مش حانروح بلاش ... اللي حاتحبه تنحاز له وتحكم له، وده حايكون

بالاسم الأصلي ... يعني لحساب الأصل ... إنت وأنا.

الحكيم: بالاختصار، حانكون إحنا الاتنين الحقيقيين تحت رحمة الاتنين المزيّفين.
عبد الوهاب: وما له! ... همّ وشطارتهم ... والي حايكسب قلبها فيهم حايعود علينا
احنا ... قصدي واحد فينا بالجائزة والحكم النهائي.
الحكيم: إنت نسيت إن الحكم النهائي والجائزة هي قلبها ... وقلبها حايكون أخده
المزيّف وانتهى الأمر ... وطلعنا احنا بالحكم غير المشمول بالنفاذ!
عبد الوهاب: حانكون طلعنا بالمشروع العظيم ... ويكون صدور الحكم للفائز معناه
إن له الفضل في نجاح المشروع.
الحكيم: يعني قلبها ما يهّمكش؟
عبد الوهاب: يهّمني في إيه؟
الحكيم: والله صدقت ... المرأة تعطيك قلبها وتاخذ جيبك.
عبد الوهاب: أهم شيء عندي يقولوا إن ألحاني فازت ... ولذلك حاعمل كل جهدي
في التلحين، ويصدر الحكم ويُعلن في كل مكان إن ألحاني اللي فازت.
الحكيم: ربنا يسهّل لك ... بس أرجو إن الحكم النهائي بفوزك ما يكونش فيه لعب.
عبد الوهاب: يعني إيه؟
الحكيم: مجرد خاطر.
عبد الوهاب: تصبح على خير.
الحكيم: وانت من أهله.

(ياسين ونور يتمشيان على النيل.)

ياسين: قل لي ... إحنا مطلوب منّا إيه بالضبط؟
نور: نمثّل ... إحنا طول عمرنا ممثّلين.
ياسين: وإيه هو الدور؟
نور: إنت مش عارف لسه؟ ... أمال إنت تقدّمت للسّتات دول وللبنت الحلوة دي
بصفة إيه؟

ياسين: بصفتي الموسيقار عبد الوهاب ... زي ما انت تقدّمت بصفتك المؤلف الحكيم.
نور: خلاص ... آدي الدور.
ياسين: مفهوم ... بس علشان إيه؟
نور: علشان البنت.
ياسين: أمّا البنت دي حلوة حلوة!

نور: وعليها عينين ... أخذت بالك وهي بتبص لي؟

ياسين: بتبص لك انت؟

نور: أظن حاتقول إنها كانت بتبص لك انت!

ياسين: طبعًا.

نور: لأ بقى ... إنت زودتها ... كل ما تقابل واحدة تقول إنها واقعة فيك؟

ياسين: وهي وقعت فعلاً.

نور: بس مش فيك انت.

ياسين: المهم إن المطلوب منّا إن البنت تقع في حب واحد فينا ... وهي وقعت في حبي

أنا.

نور: لا يا سيدي ... إنت فهمت الموضوع غلط ... المطلوب إننا احنا اللي نقع فيها ...

مش فاكّر لما تكلموا عن المسدس اللي خرجت منه الرصاصة اللي اندبّت في قلبك؟

ياسين: في قلبك انت.

نور: أيوه في قلبي أنا، مفيش مانع، وساعتها قلبي يلهب ويخرج منه فن.

ياسين: يلهب ويخرج منه فن! ... قلبها كان فرن وفنك رغيف عيش؟

نور: وانت كمان زيي؛ قلبك يلهب وتخرج منه ألحان.

ياسين: أنا مفهمتش كده ... أنا فهمت إن قلبها هو الفرن ... الفرن إحنا ... أقصد

أنا اللي أولعه، ويبقى هو الفرن اللي تنخبز عليه ألحاني وتخرج سخنة.

نور: مش معقول إن الفرن ...

ياسين: قلت لك الفرن.

نور: لأ ... اسمع بقى ... الفرن، الفرن، الفرن ... كفاية كلام في الفرن ... إحنا مش خبّازين

... إحنا ممثّلين.

ياسين: وهو كذلك ... المهم إن الفرن يولع وخلص.

نور: ولما يولع، يجرى إيه؟

ياسين: تخرج منه أجمل الألحان.

نور: ألحان مين؟

ياسين: ألحان عبد الوهاب طبعًا.

نور: مش فاهم لسه ... يعني لما قلبها هي يولّع، تخرج الألحان من قلب عبد الوهاب

ازاي؟

ياسين: عبد الوهاب مالوش دعوة ... أَلحانه حاتخرج بعيد عن الفرن، لكن الفرن الي هو قلب الحلوة لَمَّا يولع، حينحاز لي ولَّعه ... يعني بالعربي الفصيح: إذا أنا ولَّعت قلبها حاتنحاز لي وتحكم لي باعتباري عبد الوهاب ... وهو ده المطلوب.
نور: وأنا كذلك بالمثل.

ياسين: وانت كذلك، لا سمح الله!

نور: عاوز تقول إن الفايز في العرض الفني هو الي يفوز بقلبيها؟

ياسين: إنت مش تعرف إن قلب المرأة هو الي بيقودها ويوجهها ... المرأة قلب يا حضرة الفاضل ... وهي دائماً بتحكم بقلبيها ... أَمال ليه المرأة ما تنفَعش قاضي؟ لأنها إذا استلطفت مجرم حاتعطف عليه ويمكن تبرَّاه أو تخفَّف عنه ... وإذا استثقلت واحد طيَّب يمكن تحكم عليه بالشنق ... زي حضرتك مثلاً.

نور: يعني المسألة استلطاف أو استثقال؟!

ياسين: كده بالضبط.

نور: واللي شغلونا في الشغلة دي؟

ياسين: ما لهمش دعوة ... همَّ لهم النتيجة ... لهم الي يكسب.

نور: يعني بالاختصار: أنا وانت زي خيل السبق ... الحصان الي يجري ويكسب، وصاحب الحصان هو الي الناس تهنيَّه.

ياسين: تمام كده.

نور: والحصان مصلحته إيه؟

ياسين: مصلحته العناية والرعاية والعَلْف الكويس والنوم المريح والسكرُّ الي يتقدَّم له ويتوضع في فمه.

نور: على كده، صاحبي لازم يوضع في فمي سكرُّ.

ياسين: ضروري.

نور: إيه رأيك تحط يدك في يدي ونشتغل سوا؟

ياسين: يعني إيه؟

نور: يعني نفكَّر سوا إزاي نخليهم يشبَّعوننا سكر.

ياسين: بس صاحبك بيقلوا عليه بخيل.

نور: وإنت صاحبك راخر.

ياسين: لأ ما تخضنيش أَمال ... «يعني عاوز تقول إن احنا الاتنين وقعنا في اتنين

بُخَلا؟»

رصاصة في قلبين

نور: لأ مش بالدرجة دي ... المسألة عايزة شوية تكتيك.

ياسين: ربنا يقدرنا.

نور: كل واحد بقى يعمل بشطارته.

(يفترقان.)

(شقة فيفي ... وهي مستلقية تسمع موسيقى لعبد الوهاب من جهاز راديو ...

جرس التليفون يدق.)

فيفي: ألو ... مين حضرتك؟ آه ... الأستاذ الحكيم.

لأ ... ما عنديش حد ... تفضّل.

(تنهض وتُسوّي هندامها وتقول كأنّها تُخاطب نفسها):

– اللي ما عندي كتاب له.

(يدقُ جرس الباب، فتذهب وتفتح، ويدخل نور بالبيريّه والعصا كالعادة.)

– أهلاً وسهلاً.

نور: خايف أكون أزعتك!

فيفي: بالعكس ... أنا كنت لوحدي.

باسم في الراديو الغنوة الجديدة لعبد الوهاب.

نور: آه ... عبد الوهاب.

فيفي: طبعاً ... عجبك؟

نور: يعني.

فيفي: تحب تشرب إيه ... طبعاً ما عنديش هنا جلاس ... فنجان شاي؟

نور: إذا سمحت.

فيفي: حالاً (تخرج).

نور (قرب جهاز الراديو): وبعدين في عبد الوهاب ده؟

فيفي (تدخل بصينية عليها فنجان شاي): كم حته سكر؟

نور: هو الحصان له كم حته سكر؟

فيفي (وهي تصبُّ الشاي في الفنجان وتُقَدِّمه له): أنا سبقتك وشربت الشاي بتاعي ... لو كنت عارفة إنك جاي كنت انتظرتك وشربنا سوا.
نور: أنا في الحقيقة كنت متردد ... خفت تكوني نسييتيني.
فيفي: لا طبعًا ... ما اقدرش أنساك ... ما اقدرش أنساك ... مش فيه غنوة بتقول كده؟

نور: مش عارف ... أنا في الحقيقة مش غاوي أغاني.
فيفي: ليه؟ مش عبد الوهاب صاحبك؟
نور: يعني.
فيفي: يعني إيه؟ فيه بينكم حاجة؟
نور: بيننا ... إنت!
فيفي: أنا!
نور: أرجوك ... أرجوك ما تبصِّلش كده ... هو المسدس بتاعك فيه كام رصاصة؟
فيفي: مسدس إيه؟
نور: إنت نسييتيني ... رصاصة في القلب؟
فيفي: آه.

نور: آه لو كنت أقدر أغني ... كنت غنيت لك غنوة بتقول: عينك جنة ونار.
فيفي: جنة ونار مع بعض؟
نور: أيوه ... عينك جنة ونار وأنا بينهم محتار.
فيفي: مطلع كويس لغنوة ... لكن بس ازاي تكون الجنة جنبها النار؟
نور: زي نور المصباح اللي بيشعشع وجنبه النار اللي بتلسوع ... والنحلة اللي ريقها عسل تقولي له: الله ... ومعها شوكة تقولي منها آه ... والحب كله له بابين: باب النعيم وباب الجحيم ... والحب له سكتين سكة السلامة وسكة الندامة ... سكة فيها عمود وإشارات ... أحمر وأخضر ... وإذا مشيت في الأحمر أتصدم ... والأخضر مش في إيدي.

فيفي: في إيد مين؟
نور: في إيد عسكري المرور ... تعرفي عسكري المرور مين؟
فيفي: مين؟
نور: إنت.

فيفي (تضحك): عملتني كمان عسكري مرور!

نور: في إيدك تعملي الإشارة أحمر وأتصدم، أو أخضر.

فيفي: فعلاً حاجة تخلي الواحد محتار.

نور: ما فيش في الحب اختيار.

فيفي: ومين السبب؟

نور: إنت.

فيفي: أنا برضه؟

نور: أيوه انتِ ... وقلبك الي أنا عارفه.

فيفي: عارفه ازاي؟

نور: ما تعرفيش إني أقدر أقرأ أفكارك وأكشف في قلبك كل أسرارك؟

فيفي (ضاحكة): حكيم روحاني حضرتك!

نور: لا أنا مش حكيم ... أنا العيان.

فيفي: عيان بإيه؟

نور: وأنا مجنون أقول لك أنا عيان بإيه وحاسس بإيه؟!

فيفي: لأ ... خليك عاقل خمس دقائق بس وقولِّي.

نور: عيان بيكي.

فيفي: وأنا مَرَض؟

نور: مرض خطير ما لوش دوا.

فيفي: أنا عندي الدوا ... تسمح لي أدوايك.

نور: لأ ... مش عاوز أداوى ... عاوز أفضل عيان.

فيفي: فيه عيان في الدنيا عاوز يفضل عيان؟!

نور: الدوا من مرض هو إن المرض يزول ... يبعد عني، وحيث إنك انتِ المرض، يبقى

وجودك هو مرادي ... لا ... أنا متمسك بالمرض يا ستي.

فيفي (تضحك): إنت ظريف.

نور: يعني الإشارة خضرا ... وأقدر أمشي في أمان لغاية باب قلبك. ولأ حمرا — لا

سمح الله — وأخرتها أنصدم؟!

فيفي: اترك لعسكري المرور الفرصة يفكر.

(نور ويسين يجتمعان.)

نور (داخلاً عليه فَرِحًا): استظرفتنني يا عم!

ياسين: إنت شفتها؟

نور: طبعا ... زرتها واستقبلتني بالأحضان.

ياسين: وكمان بالأحضان؟!

نور: طبعا ... أمال إنت فاكر إيه؟ المسألة راحت من إيديكم خلاص.

ياسين: إزاي ... إنت عملت إيه؟

نور: وأنا أقول لك ليه؟!

ياسين: طيب شكرا.

(يتركه مسرعا.)

(ياسين يسمع ويدخل على عبد الوهاب.)

عبد الوهاب (والعود في حضنه): ما لك؟ فيه إيه؟

ياسين: المسألة حاتضيع من إيدينا.

عبد الوهاب: إزاي؟

ياسين: نور أكل بعقل البنت حلاوة.

عبد الوهاب: أكل بعقلها حلاوة ... هو قابلها؟

ياسين: راح زارها وقال إنها استقبلته بالأحضان.

عبد الوهاب: كلام إيه ده؟

ياسين: ما هو إذا كان على الكلام حا يغلبونا ... أنا عندي فكرة ... نعزمها على رحلة

في سويسرا ... وهناك البحيرات والغابات والجبال ... والستات يحبوا الفسح الحلوة ... وفي

الجو الشاعري الجميل ده ... وبعيد عن إخواننا إيأهم ... وكلامهم الفارغ ... ومع الألحان

الحلوة نفوز بقلبها بكل سهولة.

عبد الوهاب: فكرة مش بطالة.

ياسين: المهم نخلصها من إيديهم ونروح بها بعيد ... وفي جو سويسرا ومناظرها

وألحانك وروعها حاتحكم لنا في الحال.

عبد الوهاب: حاتسافروا إنتم الاتنين؟

ياسين: لو تكون إنت معايا يكون أحسن.

عبد الوهاب: لا ... أنا حاكون مشغول هنا ... قدامي السيناريست والمخرج والإنتاج

... كل ده لازم أنا اللي أجهزه.

ياسين: يبقى ما فيش مانع نساافر أنا وهي ... بس ...

عبد الوهاب: بس إيه؟

ياسين: إذا طلبت مني في جو سويسرا الشاعرى أغني لها غنوة باعتباري عبد الوهاب،
أعمل إيه؟ أقع في حيص بيص.

عبد الوهاب: اسمع ... لف رقبك بكوفية طول الرحلة وقل لها إن عندك التهاب في
الزور ... وسَمَّعها أغاني من الراديو والكاسيت.

ياسين: معقول!

عبد الوهاب: روح بقى شوف شغلك ... وانهي إجراءات السفر ونزلها هناك في
أحسن لوكاندات ... لازم تظهر قدامها بمظهر مشرف ... ما يهمناش الفلوس ... المهم
ننجح ... وابقى اكتب لي دايماً من هناك ... وطمَّني.

(نور يدخل على الحكيم.)

نور: يا دي المصيبة!

الحكيم: يا ساتر ... جرى إيه؟

نور: اختفوا ... أخذها وسافروا على سويسرا.

الحكيم: مين هم؟

نور: عبد الوهاب والبننت.

الحكيم: عبد الوهاب سافر؟ عبد الوهاب نفسه؟

نور: عبد الوهاب الشاب ... قصدي ياسين ... أخذ البننت في رحلة في سويسرا ... وطبعاً
هناك حاياكل بعقلها حلاوة ... وحاترجع بالحكم النهائي لصالح عبد الوهاب وألحانه.

الحكيم: والعمل؟

نور: ما فيش إلا إني أسافر وراهم ... وأفسد خطتهم.

الحكيم: طيب ما تسافر ... حد حاشك؟

نور: والفلوس؟

الحكيم: فلوس إيه؟

نور: الله! ... هو السفر مش لازمه فلوس ... مصاريف طيارات ولوكاندات وفُسح؟

الحكيم: فُسح؟

نور: طبعاً ... إذا جيت إنت معايا يكون أحسن.

الحكيم: لا يا سيدي ... أنا ما بسافرش.

نور: طيب أنا أسافر لوحدي ... بس لازم أكون في مستواهم ... هم طبعًا حايزلوا لوكاندات درجة أولى ممتازة، وحايصرفوا من غير حساب.

الحكيم: من غير حساب ازاى؟

نور: قصدي يعني علشان ييلفوا البنت ويؤثروا على فكرها وتنحاز لهم.

الحكيم: ما فيش طريقة غير دي؟

نور: لأ ... أبدًا ... لازم نلحقهم ... قبل فوات الأوان ... إلا بعدين نرجع نندم.

الحكيم: أمرنا الله ... أهي بلوى وجات فوق دماغى!

(في سويسرا ... والكاميرات تُصوّر النزهة في قوارب البحيرات وفي الجبال والغابات ... والثلاثة: البنت بين ياسين ونور ... ونور يعمل كل جهده لمنع البنت أن تخلو بياسين ... وياسين يحاول التخلّص من نور ... بحوادث ومفاجآت يحكيها السيناريسست. عبد الوهاب والحكيم والمخرج ينتهون من تنظيم العرض الفني ويتم اختيار المقطوعات الشعرية من شعراء البلاد العربية جميعها ... ويُلحّنها عبد الوهاب ... ويُجري عليها البروفات الحقيقية.)

ليلة العرض الأول:

تظهر صاحبة الصالون لتُقدّم في كلمة قصيرة هذا العرض على أنه نتيجة تعاون شعراء الدول العربية كلها، رمزًا لهذا التضافر والإخاء بين الأشقاء العرب ... لأن العروبة الحقيقية تنبت من الأدب والفن.

كما تُقدّم البنت الحلوة «فيفي» التي كُلفت بالتحكيم بين الموسيقي والأديب وأيهما الفائز ... فتُعلن أن الفوز للثنتين معًا ... لأن الفن والأدب والموسيقى والشعر شقيقتان متلازمان.

